

## Sèn Jan de Jugn à leà la comunanzes

Na bela festa per la Pieif de Fascia, con la zerimonia religiosa e chela zivila tel segn de la union anter i doi Comuns e la trei comunanzes de Vich, Poza e Pera

**Zelebrazions** - L'è stat na giornèda dassen spezièla chela de chest an per Sèn Jan de Jugn. La festa veiora de la Pieif de Fascia, ai 24 de jugn, chest an la era proprio de domenìa, e apede chest l'era la pruma dò la union di doi Comuns de Vich e Poza tel nef Comun che à tout sù apontin l'nom del Sènt, l Batista e l'Evangelist. Apontin tel segn del leam e de la colaborazion de duc per l ben comun se à de jout duta la festa: la Museghes de Vich e Poza, peèdes via dal tegnir de sie veie Comun, se à binà dedant a la Ciasa de Paussa, olache le ge à fat n gran cher ai giaves con vèch sonèda. Da alò con preves e autoritèdes, Museghes e Studafech, servidores con la statua del Sènt, i trei confalons de la curazies de Vich, Poza e Pera e dapò la jent, la procescion é ruèda enscin te la Pieif, passan sot l'arch de dasces con scrit "adam tel spirit".

### La zelebrazion religiosa

La zelebrazion religiosa, vidèda da don Andrea Malfatti e conzelebrèda da don Erminio, don Luciano, don Luigi, padre Giovanni, con etres doi preves foresè e l diacon Antonio, se à avert e serà con la paroles e i dons de augurie a don Andrea, ruà chest al 10' cedean da preve. Don Andrea à reingrazià per chesta atenzion e l ge à dit n gran detelpai ence a duc chi che se à dat jù per fèr bela la zelebrazion, pean via da don Erminio, che jai 10 egn l'è portà a compiment l gran lurier de restrutturazion de la Pieif e che da pech l'è arjont i 60 egn de messa.

Lombolt de Sèn Jan Giulio Florian e i esponenc de la istituzions amministratives, mèltères e culturèles e de la soziazions de val ti prumes benc, l pichet de onor di Carabinieri sun utèr, i coeres de Vich, Poza e Pera con la maestres Rosanna March e Maura Zanon sun ciantoria, ge à dat solenità a la zelebrazion, olache don Andrea à rejonà de Sèn Jan: de la Pieif a el dedichèda tel cher de la trei comunanzes, domanan sia intercescion



La zelebrazion religiosa tre la Pieif de Sèn Jan.

per jir inant delvers sul troi peà via, ma ence de sia fegura de Sènt del dubie. Duc, desche Sèn Jan, podon aer dubies vèch outa, ence sul percors emvià via da chest nef Comun, su l'importanza de fèr comunanza o su la fe. L'è giust aer dubies se chest porta al ben de duc: Sèn Jan à abù dal Segnoreddio la respostes che l chieria per sie dubies - à dit don Andrea - nos podaron dir che sion sul troi dret se peon via dai più deboi, ajache la vera autorità l'è se fèr picot e se meter al servìe percheche la comunanza cresce. N apel per i neves responsaboi del Comun, ma ben segar ence per duta la jent, che la sie bona de meter da pèrt egoismes e lamentanzes e se dèr jù per noscia comunanza. "Domanan che Sèn Jan ne deide a esser persones miore - l'è serà sù - per dèr vita a na comunanza miore."

Ence la orazions di fidei, per ladin e per talian, à metù dant l besegn de tegnir semper vives tel nef comun i valores de comunanza, condivizion e didament un co l'auter, e la procescion ofertoriala à portà sun utèr l stem del nef Comun de Sèn Jan e trei ciandèles empeèdes, simbol de la trei comunanzes vives de Vich, Poza e Pera, che ensema les pel fèr maor luster.

A la fin de la messa l'è stat amò

reingrazià don Andrea per sia prezenza viva te noscia comunanzes e ge é stat donà na bela ancona con la SS. Trinità. L'è stat recordà ence i etres doi preves che era stac ordenè de jugn del 2008 ensema a don Andrea: don Alessio Pellegrin da Vich e don Roberto Ghetta, da Ciavaleis ma ence el con reijes a Vich. En si onor i ciantores, compagné a l'orghen da Luigi Bernard, i à entonà la ciantia "Tu es sacerdos", scritta da Fiorenzo Brigadot.

Tinultima l'ombolt de Sèn Jan Giulio Florian à let jù la orazion de benediscion per l nef Comun e l ge à donà a don Andrea e a don Erminio doi chèdres en basrilief de Sèn Jan e Sènt'Ugèna, acioche chesta geijes

simboi de la fe de noscia val i sie semper te si cheres.

### La festa zivila

Dò messa, te piazz fora de geija, l veior Piaç de Pien Comun, l'è stat la pèrt zivila de la festa. De solit te la inaudazions sion usé a veder l tai de la veta. Chest'outa enveze la veta no é stata taèda, ma ciolèda ensema.

Sun paladina l'President del Consei de Comun de Sèn Jan, Cesare Bernard, à avert i descorse rejonan, con emozion, del vèrch emvià sul troi "che ne fèsc sentir n popol soul, che laora adum".

E l'è stat dassen n moment da

emozion canche l prum ombolt de Sèn Jan, Giulio Florian, compagnà da la notes de l'Inn Ladin sonèdes da la doi Museghes de Vich e de Poza adum, dedant a autoritèdes da duta la Val e a n maie de jent, à ciolèda ensema la veta bruna e checena de Vich con chela biencia e ròsola de Poza. Cater di colores de la bandiera de Fascia ades i é adum, à dit Cesare Bernard, uzan fora la speranza che più inant posse se n jontèr ite amò de etres.

Curc ma significatives i descorse de l'autoritèdes: Giulio Florian à rejonà de moment storich e, reingrazian duc chi che à didà con gaissa a jir dò chest troi, l se à augurà che l posse jir inant e crescer: la Procuradora Elena Testor ge à fat i augures a don Andrea, a don Erminio e al nef Comun, l'assessor regionèl Detomas ge à dit detelpai a la jent che à abù l coraje e l'anteveder de vardèr inant, te n temp canche i egoismes e la tema à de spes la soramessa. Dapò la festa é jita inant con la pèrt manco formala dedant a la scolina de Sèn Jan, olache l'è stat la loteria e vèch da bon da magnèr e da beiver per duc.

Licia Gross



L'ombolt de Sèn Jan lea ensema la vetes de Vich e Poza sot la notes de l'Inn Ladin.



Deplù fotografies sun  
[www.lausc.it](http://www.lausc.it)